

Martina Beeli tgamuna Sana Surselva

Installar la regiun da sanadad en Surselva ei aunc adina il tema dominont

DAD ANDREAS CADONAU / FMR

■ **Dapi il november digl onn vargau presidescha Martina Beeli da Sagogn Sana Surselva, la corporaziun dallas vischnauncas sursilvanas che sefatschenta cun il provediment medicinal en Surselva.** Da munconza da lavur sa la nova presidenta da Sana Surselva, *Martina Beeli*, buca selamentar. Ella ha surpriu il tgamun dalla corporaziun dallas vischnauncas sursilvanas che sefatschenta cun il provediment medicinal il november vargau da *Thomas Buchli*. Il president communal dalla vischnaunca da Stussavgia ha presidiu Sana Surselva dapi la fundaziun avon tschun onns. La pura e commembra dalla suprastanza communal da Sagogn ha explicau da s'interessar per damondas dalla sanadad e dil provediment medicinal. Cun quellas damondas sefatschenta ella gia sco suprastanza communal e responsabla per sanadad, socialesser, cultura ed agricoltura. Neu da siu uffeci communal ha ella presentau la vischnaunca da Sagogn allas scuntradas da Sana Surselva, ina corporaziun dallas vischnauncas sursilvanas. E quels delegai e delegadas han eligiu Beeli il november vargau al tgamun dalla organisaziun. Part dalla suprastanza da Sana Surselva fan, sper Mar-

tina Beeli, aunc *Christian Capaul* da Laax sco viceparsura, *Carmelia Maisen*, presidenta communal dalla vischnaunca Ilanz/ Glion, *Robert Cajacob*, president communal da Mustér e *Dumeni Tomaschett*, president communal da Trun. La damonda dominonta che fatschenta era la nova parsura e la suprastanza da Sana Surselva ei da scafir en Surselva ina regiun da sanadad cun tut ils purschiders sut in tetg. Ina varianta installada en ulteriuras regiuns dil cantun Grischun e promovida dalla regenza grischuna.

Sistiu il project

E gest enteifer il project da realisar la regiun da sanadad en Surselva ha la nova presidenta stuiu comunicar ina frenada. Il project da cavigliar ils asils da tgira e da vegls en Surselva sut in tetg administrativ ei vegnius sistius. La presidenta da Sana Surselva deplorescha quei fatg, ella vesa divers avantatgs da collaborar pli stretg denter ils singuls purschiders da survetschs medicinali en Surselva. Gest el temps present nua che persunal qualificau ei tschercaus. Tenor Beeli lubess la collaboraziun denter las diversas instituziuns sco per exempel spitex, spital ed asils da brattar persunal duront fasas da surcapacitads en in'instituziun e mun-



Ha surpriu il tgamun da Sana Surselva, la commembra dalla suprastanza communal da Sagogn Martina Beeli.

FOTO A. BEELE

conzas en autras. E secapescha la pusseivladad da spargnar cuosts administrativs. Beeli ha accentuau ils avantatgs dad in agir ord atgna forza visavi ad in eventual

sforz davart dil cantun. La presidenta da Sana Surselva ha puntuau la valor dil sectur da sanadad en Surselva pertuccont siu survetsch e sco patrun da lavur.

■ POMICULTURA SURSELVA



La puma sursilvana ei tschercada. Luvrar per quella, tgirar pumera e promover sorts ei denton caussa d'individualists.

FOTO A. BEELE

Vinavon per curtgins e pumera

(fmr/abc) **L'Uniu da pomicultura Surselva ha festivau il 2018 siu giubileum da 20 onns existenza. Igl onn 1998 havevan adherents dalla puma indigena fundau quell'uniun, ella era resortida d'ina gruppa d'interess luca ch'existeva avon.** Dapi zacons onns ein las activitads dall'uniun limitadas e sereducidas. Mesjamna sera ha la suprastanza envidau alla radunonza generala. Dils 45 commembers actuals dall'entira Surselva ein 18 stai presents, quei che demuossa ch'igl interess ei nuota schi pigns per la caussa dalla pomicultura indigena. Il president *Sep Benedetg Candin* e ses consuprastonts *Erika Schätti Koch* (actuara), *Sigisbert Deplazes* (cassier), *Lydia Bapst-Jörger* (assessura) e *Silvio Cadruvi* (assessur) han rapportau da dus onns ch'ei stai in cuntrast en connex culla raccolta e l'elaboraziun dils fretgs. Igl onn 2018 ei stau in onn che biars possessurs da pumera han giu bia lavur culla raccolta. Ei seigi stau in onn cun raccolta d'excellenta qualitat. Meila, tscherchas ed auters fretgs ha ei dau en abundanza e per gronda part senza macclas e vermaneglia. Igl october 2018 ha l'uniun lu era saviu organisar cun grond success sin piazza fiera a Glion ina grond'exposiziun da meila e péra. Igl onn

vargau 2019 ei staus en connex culla raccolta in alternond ch' ha dau pauca lavur e cun quei era activitads.

Alla radunonza generala ha la suprastanza vuliu vegnir en discuors culs commembers ed intervegnir lur opiniun. Aunc avon ha il president priu cumiau da *Silvio Cadruvi* ch'ei sortius suenter biars onns dalla suprastanza. Per el ha la radunonza eligi *Martin Camenisch*, Cuera/Flond.

Curdin Giger, convischin da Zignau, cussegliader puril al Plantahof, ha silsuenter menau in workshop d'ideas, projects e visiuns. En fuorma d'in'analisa han ils presents giu da nudar schanzas, prighels, avantatgs e disavantatgs en connex cullas perspectivs dall'Uniu da pomicultura Surselva. Il resultat duei servir alla suprastanza da sviluppar in program da lavur adattau. L'uniun da pomicultura duei daventar pli activa. Aschia duei ina meisa rodonda regulara en in liug, alternond en curtgins ni en in'ustria, promover il brat d'experientschas. Organisar ina fiasta da pumera ni da raccolta, in'excursiun comunabla sco era ina dieta davart la pumera da best ault ein las activitads che la pluralitad dils commembers giavischa pigl avegnir.

Frisal – Frisal – il musical

■ (fmr/abc) **La stad 2020 dat ei puspei in musical en Surselva: Per siu giubileum da 40 onns presenta la Compagnia Rossini cun in musical cul num «Frisal – Frisal».** Ina roscha gliued seregorda da quei spitachel. Ils 20 d'october 1979 ei stau la premiera en casa da scola a Danis. Il musical «Frisal – Frisal» dad *Armin Caduff* ei stau in eveniment ch'ha muentau l'entira Surselva. *Gian Gianotti* ha menau la reschia, *Meinrad Giger* ha dirigi il chor. Ina roscha gliued seregorda aunc da quei musical en dus acts d'avon 40 onns. Igl ei stau igl emprem grond musical romontsch. *Armin Caduff*, da cuminonza cun ina massa musicants, acturas ed acturs laics, gidontas e gidonters, ha presentau ina parodia sur d'in pign liug che siemia dil grond turissem. Uonn, pil giubileum da 40 onns da Frisal – Frisal lai il cumponist ed autur suandar ina secunda part. Ins astga esser plein marveglias co ils da Frisal ein sestellegiai e co lur vitg ei sevilluppau. En sia

novissima newsletter che la Compagnia Rossini ha distribuui dacuort san ins leger il suadont pertuccont il musical dalla stad 2020: «Ord attaschonza tier la patria e per serrar il tscherchel dalla historia da Frisal – Frisal presentein nus puspei a Danis-Tavanasa il musical».

Il grond turissem

Igl onn 1979 fuva la tematica dil grond turissem actuala. *Caduff*, *Gianotti*, *Giger* e rodund 140 gidontas e gidonters havevan intermediau quella a moda divertenta cun tuttas pusseivladads da s'exprimer. «Frisal Frisal – la secunda part» presenta la Compagnia Rossini dils 16 tochen ils 26 da fenadur 2020, puspei ella casa da scola a Danis, quei cun cantaduras, cantadurs, musicistas e musicists e gliued dalla cultura dalla Surselva.

Reservaziuns da plaz per quei punct culminont cultural dalla stad proxima ein pusseivlas. Mira www.rossini.ch, ni 079 335 41 05.



Frisal – Frisal 1979: Gionin, il fegl digl ustier (Gabriel Derungs), ei era cavrer, el ei interessaus dapl dil ballapei e dallas turistats che da sias cauras.

■ MUSTÉR

L'interpresa Distec vul producir dapl per l'aviatica

(rtr/fmr) L'interpresa industrialia Distec a Mustér vul seposiziunar pli fetg el sectur dall'aviatica. Per fa quei pass ha l'interpresa la finamira da survegnir entochen la fin digl onn 2020 in ulteriur certificat da qualificaziun. Sco ils responsabels han detg sin damonda dad RTR ei in tal certificat necessari per insomma puder s'annunziar per ulteriuras offertas en la branscha d'aviatica.

Dapi il 2014 gia furnitur da Pilatus

Gia dapi igl onn 2014 ei l'interpresa industrialia Distec a Mustér ina furnitura per l'interpresa d'aviatica Pilatus dalla Svizra. Era autras interpresas dalla sparta d'aviatica ed el sectur special, sco per exempel la construziun da rachettas ni parts da rachettas dad Orbit, s'audan tier la clientella dalla Distec. Tgi che stetti davos quellas interpresas sappien ins denton buca tradir. Cun biaras interpresas hagi la Distec nummadamein firmau ina cunvegna da discreziun, di il meina-project *Hans-Peter Müller*. Quei seigi in proceder usitau en la branscha.

Certificats da qualitat ston ins haver

Las preparativas per ils schinumai audits hagian gia entschiet, di il meina-project ch'habitescha el cantun Turgovia e che tgira surtut il contact culs clients dall'interpresa. Las finamiras che seigien da contonscher seigien denton gest el sectur dall'aviatica fetg aultas e complexas, denton tut ils responsabels seigien perschuidi d'haver il certificat giavischau sin la fin digl onn 2020.

Las fermeziats dalla Distec

Il mument hagian ins propi buca bia lavur, di Müller. Quei hagi da far cun las midadas da far empustaziuns. Aschia vegnien las empustaziuns fatgas ad adina pli cuorta vosta ed aschia seigi ei difficil da planisar. Mo per igl onn 2020 seigien ins optimistic da contonscher semeigliontas cefras sco il 2019 e lez seigi staus in bien onn per la Distec, di Müller. Per tgei las fermeziats dalla Distec seigien surtut las persunas che lavurien per l'interpresa, persunas che seigien scoladas e sein motivadas. In avantatg seigi era l'experienza dall'interpresa e quei seigien facturs che svaneschian buc aschi spert, accentuescha il vendider versau.

LA QUOTIDIANA

Editura: Samedia Press AG
 Editor: Hanspeter Lebrument
 CEO: Thomas Kundert

Editura Samedia,
 Via Sommerau 32, 7007 Cuira;
 tel. 081 255 50 50,
 mail: verlag@samedia.ch

Redacziun responsabla:
 Fundaziun Medias Rumantschas (FMR):
Schefredactor FMR: David Truttmann (dat)
Substitut schefredactor FMR:
 Martin Cabalzar (mc)
Redacziun FMR:
 Flurin Andry (fa), Augustin Beeli (abc),
 Sandro Buchli (sb), Andreas Cadonau (ac),
 Annatina Filii (afi), Hans Huonder (hh),
 Gieri Martin Maissen (correctur)
 Susi Rothmund (sr), Gion Nutegn Stigier (gns).

Adressas redacziunalas:
 FMR Fundaziun Medias Rumantschas,
 Via da Masans 2, 7000 Cuera, tel: 081 250 48 00,
 mail: redacziun@fmrmedia.ch

Servetsch d'abunents e da distribuziun:
 Via Sommerau 32, 7007 Cuira,
 tel. 0844 226 226,
 mail abo@samedia.ch

Inserats:
Samedia Promotion.
 Via S. Clau Sura 11, 7130 Glion
 tel. 081 920 07 17, fax 081 920 07 18,
 mail: ilanz.inserate@samedia.ch

La Quotidiana cumpara tschintg giadas ad emna
Ediziun derasada: (Südstschweiz cumplet)
 73364 exemplars, ediziun vendida 69321 exemplars,
 autentifitg (WEMF-/SW-, 2018)
Derasaziun: 163 000 lecturs (MACH-Basic 2018-2)

Pretschs d'abunaments sut:
www.suedostschweiz.ch/aboservice

Communicaziun da participaziun considerabla
 sin fundament da art. 322 CP:

nagin

© Samedia